

## Propuestas d'Iniciativa pol Asturianu con motivu de la negociación de los *Presupuestos d'Asturies 2020*

Nun contestu de negociación de *Presupuestos del Gobiernu d'Asturies 2020* ente les fuerces polítiques que lleven el desendolcu de la Llei d'Usu del asturianu y la oficialidá nel so programa, dende Iniciativa pol Asturianu albidramos que se fai necesario dar más pasos alantre nel marcu actual, qu'entá permite un ampliu marxe de trabayu, mientras se sigue trabayando nel consensu pa la reforma estatutaria.

Por ello dende Iniciativa pol Asturianu, apuntamos delles llinies prioritaries nes que camentamos preciso recoyer meyores presupuestaries que-y dean una mayor presencia al asturianu y al gallego-asturianu, ensin que pretenda ser esti un documentu que pormenore toles midíes necesaries, sí qu'espresa dalguna de les cuestiones que pueden considerase más urxentes y de fácil desendolcu nesti momentu.

### Plan de Normalización y tresversalidad

- Partida pal desendolcu d'un Plan de Normalización tresversal a tol gobiernu. Nesi sen sedría necesario que cada Conseyería tuviera un presupuestu propiu y especialmente que marcara unos oxetivos de normalización en collaboración cola Conseyería de Política Llingüística, dientro de les llinies d'inversión yá esistentes.
- Presupuestu pa la robla de convenios colos Conceyos pa da-y continuidá y dignidá a los Servicios de Normalización Llingüística, asina como la creación de nuevos servicios onde nun existen, venceyaos a una inversión compartida ente los Conceyos y l'alministración autonómica.
- Ayudes a la creación: meyorar les ayudas esistentes pa edición de llibros, aumentar la partida pa medios de comunicación privaos y condicionales al usu de la toponimia oficial en tola publicación, recuperación de les ayudas a la edición d'audiovisuales.
- Aumentu del presupuestu y personal de Política Llingüística, acordies coles necesidaes d'una política llingüística más avanzada.

### Infraestructures

- Plan de revisión y corrección de la rotulación toponímica y xeneralización del billingüismu nos indicadores. Busca d'alcuertu cola alministración central pa llevalo tamién a les carreteres y ferrocarriles estatales, asina como nel aeropuertu.

## Educación

- Desendolque d'acciones de normalización nos centros educativos (cartelería, comunicaciones, toponimia, sensibilización, etc.)
- Partida pa un plan de formación llingüística del profesoráu en primaria y secundaria.
- Partida destinada a la creación d'un Graue de Periodismu na Universidá d'Uviéu que tenga al asturianu como llingua central de docencia, buscando formar promociones de periodistes que puedan desendolcar una RTPA col asturianu como llingua vehicular.
- Partida dedicada a la edición de materiales didácticos pa la escuela, asina como pa los nuevos niveles europeos.
- Aumentu de la partida dedicada a l'Axenda Didáctica.
- Aumentu del plan pilotu pal usu del asturianu como llingua vehicular en primaria, con un plazu pa la busca de la so xeneralización nel máximu númberu de centros posible.
- Creación d'un plan pilotu asemeyáu al desendolcáu en primaria pa dar la opción a les families de cuntar con una parte de la formación col asturianu como llingua vehicular.
- Recuperación del horariu de l'asignatura de Llingua Asturiana y Lliteratura en Bachilleratu, que va pocos años pasó de 4 a 1 hora selmanal, convirtiéndose nuna asignatura residual.
- Inclusión de l'asignatura de Llingua Asturiana y Lliteratura como asignatura voluntaria de la qu'esaminase nes pruebas de la EBAU.

## Industria

- Creación de llinies d'ayudes pal usu del asturianu nel comerciu y nel etiquetaxe de productos fabricaos n'Asturies.
- Creación o tresformación d'una marca de calidá na que la llingua asturiana dea identidá al productu.

## Radiotelevisión Pública d'Asturies (RTPA)

- Establecimientu d'una cuota creciente de programes n'asturianu. Poner los medios necesarios, lo que nun tien que necesariamente suponer una medra del presupuestu, sinón la voluntá de da-y más presencia al idioma. Da-y tamién presencia al gallego-asturianu nes emisiones.
- Creación d'una direcció de conteníos n'asturianu que vele pol desarrollu d'esi llabor dientro de la RTPA, asina como d'un equipu de técnicos que trabayen asesorando a profesionales y productores. Eliminación de la partida dependiente de Política Llingüística pa la emisión de programes n'asturianu. El presupuestu pa programes n'asturianu ha salir con normalidá del corriente del Ente de Comunicación.

- Poner los medios humanos y técnicos necesarios pa que pueda ponese en marcha a lo menos un informativu diariu n'asturianu de la forma más rápida posible.
- Establecimientu d'un plan de formación llingüística y cultural seriu y estable na RTPA.
- Creación d'una llinia propia d'ayudes a la producción d'audiovisuales de ficción n'asturianu.
- Partida pa la realización y emisión de doblaxes al asturianu d'audiovisuales, asina como pal sotituláu.
- Puesta en marcha de programación infantil y deportiva n'asturianu.
- Creación d'un programa-concursu centráu na conocencia de la cultura y la llingua asturianas.

### **Ciencia y Universidaes**

- Creación d'un Grau de Filoloxía Asturiana.
- Establecimientu d'ayudes y premios a la realización de TFG, TFM y tesis n'asturianu.
- Programa de formación del profesoráu na Universidá.
- Potenciación del Día de les Ciencies Asturianas col asturianu como llingua vehicular.

### **Funcionariáu**

- Plan de sensibilización y formación llingüística del funcionariáu con ventayes llaborales pol deprendimientu o ameyoramientu del nivel llingüísticu, que permita l'aplicación efectiva de la llexislación nesta materia.

### **Facienda**

- Busca de fórmules que xeneren bonificaciones fiscales a les empreses qu'usen l'asturianu na so actividá, al traviés d'un sellu de calidá llingüística.

### **Sanidá**

- Plan de sensibilización y formación llingüística del funcionariáu, especializada nes cuestiones de salú, col envís d'evitar discriminación y errores nos diagnósticos.

## Turismu

-Desendolque de campañes de promoción turística onde la llingua asturiana tenga una presencia importante como elementu de visibilización del idioma y la identidá d'Asturies.

## Cultura

-Llinies de promoción de la cultura n'asturianu dientro de los espacios culturales del Gobiernu (música, teatru, artes, etc.)  
-Promoción de la lliteratura n'asturianu y gallego-asturianu.

## Negociación col estáu central

Delles midíes necesaries pa la normalización del asturianu pasen necesariamente por un alcuerdu col estáu central, por mor de formar parte de les competencies propies del Gobiernu d'España. Camentamos necesario que dientro d'esta negociación puedan quedar afitae estes midíes, col envís de completar les necesidaes del idioma en toles alministraciones:

-Inclusión de los escritores n'asturianu dientro de los Premios Nacionales de Lliteratura.  
-Inclusión d'un presupuestu nes partíes del estáu pa l'Academia de la Llingua Asturiana, como les del restu de les academies de Llingües d'España.  
-Plena l'igualdá del asturianu, como llingua protexida pola Constitución y l'Estatutu, anque entá non oficial, dientro de toles polítiques de promoción llingüística (Institutu Cervantes, Ministeriu de Cultura, usu del asturianu en webs, DNI, publicidá institucional, etc.)